



当前位置 > 首页 > 诸葛亮文化研究 > 正文

诸葛武侯明赋一篇

八阵图赋 杨维桢

遐哉邈乎，蚕丛故墟。剑阁峥嵘兮，石栈萦纡。车不得而运兮，马不得以驱。非王业之所基兮，徒抗险乎中都。帝中山之苗裔兮，乃犹厄此斗隅。黄星射乎宋野兮，强猢狲乎江东。伟伏龙之感激兮，起左顾于隆中。允识时之俊杰兮，吞余子于一空。图八阵以用武兮，必先天而独得。六十四之成算兮，本马图之全画。三十二之歧分兮，妙阴阳之互宅。天地衡轴兮，风云盘辟。龙飞鸟逝兮，蛇蟠虎翼。挠之无踪兮，运之无方。进退不愆兮，出没靡常。奇不失于正兮，怪不越于堂堂。伏至动于至静兮，寓能柔于能刚。喻以常山之蛇势兮，曾未测其汪洋。巴之水兮砮崖坼壁，峡之涛兮风霆霹雳。彼箕张而翼布兮，曾不转其块石。非神物之阴卫兮，孰万夫之捍力？想貔貅之对垒兮，指白羽之一麾。运擒纵于掌握兮，算不出于八奇。贼之望而走兮，甘巾帼之受嗤。按渭滨之所屯兮，实鼎国之王师。自风后之有图兮，肆獯蚩之赫伐。逮尚父之六弑兮，佐牧野之黄钺。孙吴为之剽掠兮，徒生灵之血肉。鄙败事之腐儒兮，彼谗生其又何法？兹八阵之犹觉兮，轶轩皇与天老。曰流马与木牛兮，又神机之所造。歎中营之告变兮，哀夫人之夺早。讫黄芒以当天兮，掩炎精之皞皞。呜呼！西望岷峨兮，南泊锦江。山川相缪兮，地老天荒。歌梁父兮酹吾觞，招谪仙兮呼子长。访鱼复之沙碛兮，吊新都之战场。虽武无用于今之时兮，亦以发吾文之气刚。

时间： 2011-06-01 09:55:37 来源：东潮网 【责任编辑： 刘东玮 】

我要评论

用户名:

提交

评论(当前评论共0条)

此新闻暂无评论信息